

SOALAN NO. : 72

**DEWAN RAKYAT
PERTANYAAN LISAN**

PERTANYAAN : LISAN

**DARIPADA : DR. MOHD HATTA BIN MD. RAMLI [KUALA
KRAI]**

TARIKH : 26 JULAI 2017 (RABU)

SOALAN:

**Dr. Mohd Hatta Bin Md. Ramli [Kuala Krai] minta MENTERI SUMBER
ASLI DAN ALAM SEKITAR menyatakan tindakan lanjut Kementerian
terhadap syarikat Climate Protector Sdn Bhd yang didakwa melanggar
syarat-syarat yang ditetapkan oleh Pertubuhan Bangsa-Bangsa Bersatu
dalam perjanjiannya dengan negeri Kelantan dalam urusan 'reducing
emissions from deforestation and forest degradation' (REDD).**

JAWAPAN:

Tuan Yang di-Pertua,

Kerajaan Negeri Kelantan telah menandatangani perjanjian bersama syarikat Climate Change Protector Sdn. Bhd untuk melaksanakan urusan kredit karbon. Kerajaan Negeri Kelantan telah memperuntukkan 396,000 hektar kawasan hutan bagi tujuan pelaksanaan urusan ini secara konsesi kepada pihak syarikat selama 30 tahun.

Dalam masa yang sama, Malaysia sedang membangunkan dasar bagi program *Reducing Emissions from Deforestation and Degradation and the Role of Conservation, Sustainable Management of Forests and Enhancement of Forest Carbon Stocks in Developing Countries* (REDD+) di bawah Konvensyen Rangka Kerja Perubahan Iklim Pertubuhan Bangsa-Bangsa Bersatu (UNFCCC).

Malaysia juga sedang berusaha untuk mendapatkan pembiayaan *Results Based Payments* (RBP) melalui dana Green Climate Fund (GCF). Dana RBP ini akan digunakan untuk pelaksanaan program REDD+. Bagi tujuan ini, Malaysia telah melaksanakan pelbagai aktiviti di peringkat antarabangsa dan nasional serta '*engagement*' dengan pihak berpentingan seperti kerajaan negeri dan badan bukan kerajaan bagi memastikan pelaksanaan mekanisme REDD+ berjalan lancar.

1. Susulan daripada itu, Kementerian telah melaksanakan perkara-perkara berikut:
 - i. Mengeluarkan kenyataan akhbar bagi menjelaskan pendirian Kerajaan mengenai pelaksanaan mekanisme REDD+;
 - ii. Mengemukakan maklumat secara bertulis mengenai mekanisme REDD+ kepada kerajaan negeri dan pihak-pihak berkepentingan yang lain; dan
 - iii. Bersedia untuk memberikan penjelasan dasar dan teknikal kepada mana-mana Kerajaan Negeri atau pihak berkepentingan yang ingin mengetahui mengenai mekanisme REDD+. Dalam hal ini, Kementerian telah memberikan taklimat mekanisme REDD+ kepada Kerajaan Negeri Sembilan.

Sekian, terima kasih.

NO. SOALAN: 73

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
DARIPADA : TUAN KHOO SOO SEANG [TEBRAU]
TARIKH : 26.07.2017 (RABU)

TUAN KHOO SOO SEANG [TEBRAU] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah usaha Kementerian dalam menambahbaikkan program TUKAR demi membantu penjaja, pengendali makanan dan perusahaan kecil tempatan untuk menjadi lebih kompetitif dan juga mengurangkan kebergantungan kepada pekerja asing dalam situasi perniagaan semasa dan ekonomi yang mencabar.

JAWAPAN

Tuan Yang Di-Pertua,

Kementerian telah mengambil inisiatif menambahbaik program TUKAR dengan menganjurkan sesi latihan berkaitan pengurusan kewangan dan perniagaan runcit untuk peserta-peserta TUKAR. Modul latihan yang diberikan adalah memfokuskan kepada asas pengurusan kewangan, rancangan perniagaan, pengurusan pembekal, strategi pemasaran, strategi jualan dan pengurusan inventori serta pengurusan perakaunan. Metodologi latihan yang digunakan adalah berbentuk teori dan praktikal. Latihan ini dijangka dapat membantu peserta TUKAR menjadi lebih kompetitif dalam perniagaan mereka.

Selain daripada itu, peserta program TUKAR juga digalakkan untuk mengembangkan segmen perniagaan seperti mewujudkan kafe, mewujudkan segmen barangan basah dan segar serta tidak terhad kepada menjalankan perniagaan peruncitan semata-mata di premis perniagaan mereka.